

- संविधान अपनावण री 75वीं वर्षगांठ रे मौके आज एक साल ताई चालण वाळां जळसा सरू व्ह्या-राष्ट्रपति जनता ऊं व्यवहार मांय संवैधानिक आदर्शां ने शामिल करण री अपील कीनी।
- प्रदेश मांय संविधान दिवस रे मौके न्यारा-न्यारा कार्यक्रम राख्थी ज्या- विधानसभा अध्यक्ष वासुदेव देवनानी संविधान दीर्घा जनता ने सूंपी।
- सुप्रीम कोर्ट चुनाव मांय ईवीएम री ठौड़ मतपत्र काम लेवण री मांग करण वाळी जनहित याचिका खारिज कीनी।
- प्रदेश रा तापमान मांय उतार-चढ़ाव बीचे केई ठौड़ां रात री बगत पारो सामान्य ऊं नीचे।

000

संविधान स्वीकार करण री आज 75वीं वर्षगांठ है। ई मौके सरकार एक साल ताई चालण वाळा जळसा री सरूआत कीनी। अ समारोह 26 नवम्बर, 2025 ताई देशभर मांय राख्था जावेला। संविधान सभा 26 नवम्बर, 1949 ने संविधान अंगीकार कीनो हो जो 26 जनवरी 1950 ने लागू करी ज्यो। संविधान दिवस रे मौके आज नई दिल्ली मांय संविधान सदन रा केन्द्रीय कक्ष मांय खास कार्यक्रम राख्थी ज्यो जिण ने राष्ट्रपति द्रौपदी मुर्मू सम्बोधित कीना। ई मौके वे साल 2047 ताई विकसित भारत बणावण रो लक्ष्य हासिल करण सारू जनता ऊं व्यवहार मांय संवैधानिक आदर्शां ने अपनावण बाबत कह्यो। राष्ट्रपति भारत रा संविधान ने जीवित अर प्रगतिशील दस्तावेज बताता थकां कह्यो के ई रे जरिये देश सामाजिक न्याय अर समावेशी विकास रा लक्ष्य हासिल कीना है। राष्ट्रपति लोकसभा अर राज्यां री विधानसभावां मांय महिलावां सारू आरक्षण ऊं जुड़्यो नारी शक्ति वंदन कानून बणावण री ई सराहवणा करता थकां कह्यो के ई कानून ऊं महिलावां ने मजबूत बणावण रो नुवो जमानो सरू व्ह्यो है।

राष्ट्रपति कह्यो के संविधान री प्रस्तावना मांय माण्ड्योड़ा न्याय, स्वतंत्रता, समानता अर बंधुत्व रा आदर्श देश रा सगळा रहवासियां ने फलबा-फूलबा अर समाज मांय एक-दूजा री देखरेख करण रो मौको देवे है। ई मौके उप-राष्ट्रपति जगदीप धनखड़ कह्यो के ओ खास दिन देश रा संविधान ने स्वीकार करण रा 75 साल ने मनावण रा रूप मांय ऐतिहासिक पड़ाव ने बतावे है। ई मौके लोकसभा अध्यक्ष ओम बिरला सगळा सांसदां ऊं संविधान स्वीकार करण रा 75 वां साल ने आप-आप रा चुनाव हलका मांय लोगां बीचे मनावण री अपील कीनी। वे सांसदां ऊं संविधान सभा कानी ऊं तैय मर्यादा मांय रह र चर्चा करण बाबत ई कह्यो। कार्यक्रम रे दौरान राष्ट्रपति देश रो संविधान स्वीकार करण री 75वीं वर्षगांठ ने समर्पित यादगार सिक्को अर डाक टिकट जारी कीनो। कार्यक्रम मांय दो पोथियां- मेकिंग ऑफ द कॉस्टीट्यूशन ऑफ इंडिया: ए ग्लिम्पस" और "मेकिंग ऑफ द कॉस्टीट्यूशन ऑफ इंडिया एण्ड इट्स ग्लोरियस जर्नी रो विमोचन ई करी ज्यो। ई सागे ई संविधान रो संस्कृत अर मैथिली भाषावां मांय अनुवाद ई जारी करी ज्यो। कार्यक्रम मांय प्रधानमंत्री नरेन्द्र मोदी, केई केंद्रीय मंत्री, लोकसभा अर राज्यसभा मांय विपक्ष रा नेता, सांसद अर मान्योड़ा लोग सिरकत कीनी।

प्रधानमंत्री नरेन्द्र मोदी संविधान री 75वीं वर्षगांठ रे मौके जनता ने शुभकामनावां दीनी है। वे सोशल मीडिया प्लेटफॉर्म रे जरिये कह्यो के संविधान देश ने रस्तो बतावण वाळो है। प्रधानमंत्री कह्यो के संविधान देश री हजारां सालां री परंपरा री आधुनिक अभिव्यक्ति है। प्रदेश मांय ई संविधान दिवस रे मौके आज न्यारा-न्यारा कार्यक्रम राख्थी ज्या। जयपुर मांय राख्थी ज्या कार्यक्रम मांय मुख्यमंत्री भजन लाल शर्मा कह्यो के संविधान ऊं देश री जनता ने मजबूती मिली है। वे कह्यो के संविधान मांय बतायी ज्या कर्तव्यां री पालना रा बारा मांय जाग जगावण रा मकसद ऊं प्रदेश मांय न्यारा-न्यारा कार्यक्रम राख्था जा रह्या है।

संविधान दिवस रे मौके विधानसभा अध्यक्ष वासुदेव देवनानी विधानसभा भवन रा राजनैतिक आख्यान संग्रहालय मांय नुवी बणायी ज्यी संविधान दीर्घा जनता ने सूंपी। इण मांय मूल संविधान रा बाईस हिस्सां री सरुआत मांय बतायी ज्यी कलाकृतियां रो दरसाव करी ज्यो है। ई मौके देवनानी कह्यो के संविधान दीर्घा रो मकसद आमजन अर नौजवानां मांय देश अर इण रा संविधान रो बोध करावण सागे ही संविधान अर नैतिकता रा प्रति जाग जगावणो है। वे संविधान दिवस ने संविधान बणावण वाळां रा प्रति सिरधाभाव जताता थकां वां रा योगदान रा प्रति कृतज्ञता जतावण रो स्मरण दिवस बतायो। विधानसभा मांय पहली दफा राख्खी ज्या ई जळसा मांय मोटी तादाद मांय वकील, कानून री भणार्ई करण वाळा विद्यार्थी, मान्योडा लोग अर विधानसभा रा अहलकार अर कर्मचारी सिरकत कीनी। जळसा मांय संसदीय कार्य अर विधि मंत्री जोगाराम पटेल अर विपख रा नेता टीकाराम जूली ई मौजूद रह्या। जयपुर मांय चित्रकूट स्टेडियम ऊं पदयात्रा निकाली ज्यी, जिण मांय युवा मामलात् अर खेल मंत्री कर्नल राज्यवर्धन राठौड़ समेत मोटी तादाद मांय नौजवान अर जनता सिरकत कीनी। दौसा मांय सूचना अर जनसंपर्क विभाग री ओर ऊं फोटो प्रदर्शनी अर संगोष्ठी राख्खी ज्यी। पाली मांय सूचना अर जनसंपर्क विभाग री ओर ऊं प्रदर्शनी लगायी ज्यी। श्रीगंगानगर अर बारां मांय प्रदर्शनी अर संगोष्ठी सागे सवाल-जवाब री होड़ां राख्खी ज्यी। अजमेर मांय युवा कार्यक्रम अर खेल मंत्रालय री ओर ऊं मैराथन दौड़ राख्खी ज्यी। चूरू मांय संविधान ऊं जुड़ी प्रदर्शनी लगायी ज्यी। टोंक मांय ई न्यारा-न्यारा कार्यक्रम राख्खी ज्या। कोटा मांय ई प्रदर्शनी लगायी ज्यी अर संगोष्ठी राख्खी ज्यी। ई मौके अतिरिक्त जिला कलेक्टर श्रीमती कृष्णा शुक्ला संविधान ने देश री आत्मा बतायो। हनुमानगढ़ जंक्शन रा सूचना एवं जनसंपर्क कार्यालय मांय कार्यशाला राख्खी ज्यी अर चित्र प्रदर्शनी लगायी ज्यी। ई मौके पाली रा राजकीय कन्या महाविद्यालय मांय राष्ट्रीय सेवा योजना रा तैत लगायी ज्या शिविर मांय संविधान दिवस अर नशा मुक्ति अभियान ऊं जुड़ी कार्यशाला राख्खी ज्यी। सिरोही जिला री स्कूलां, कॉलेजां अर दूजी ठौड़ां न्यारी-न्यारी होड़ां अर जागरूकता कार्यक्रम राख्खी ज्या। भरतपुर मांय चार दिन री फोटो प्रदर्शनी लगायी ज्यी है। सांचौर, बांसवाड़ा अर बाड़मेर ऊं ई संविधान दिवस रे मौके न्यारा-न्यारा कार्यक्रम राख्खा जावण रा समाचार मिल्या है।

000

दिल्ली री हवा मांय बधती गंदगी ने ध्यान राखता थकां कोटपूतली-बहरोड़ जिला रा राष्ट्रीय राजधानी हलका मांय आवण वाळा नीमराणा अर बहरोड़ मांय ग्रेडेड रिस्पॉन्स एक्शन प्लान-4 लागू कर दियो ज्यो है। ई रा तैत प्रशासन बणार्ई-चुणार्ई, मोटर गाड़ियां ऊं निकलबा वाळा धुआ, पराली बाळबा रा वाक्यां अर औद्योगिक गतिविधियां माथे काबू करण सारु जरूरी दिशा-निर्देश जारी कीना है। वायु प्रदूषण ऊं सांस ऊं जुड़ी बीमारियां, आंख्या मांय जलन अर एलर्जी रा मामलां मांय बधोतरी व्हे रही है।

000

सुप्रीम कोर्ट चुनाव करावण सारु निर्वाचन आयोग ने इलेक्ट्रॉनिक वोटिंग मशीन-ईवीएम री बजाए कागज़ रा मतपत्र काम लेवण रो हुकम देवण ऊं जुड़ी जनहित याचिका खारिज कर दीनी है। न्यायाधीश विक्रम नाथ अर पी.बी. वराले री पीठ ईवीएम मांय कथित हेरफेर रे कारण कागज़ रा मतपत्र काम लेवण री मांग नामंजूर कर दीनी। इण ऊं पैली मार्च महीना मांय ई सुप्रीम कोर्ट कागज़ रा मतपत्रां रे जरिये लोकसभा चुणाव करावण रा हुकम देवण री मांग करण वाळी जनहित याचिका माथे विचार ऊं नट ग्यो हो ।

000

सीमा सुरक्षा बल रा महानिदेशक दलजीत सिंह चौधरी जोधपुर मांय राजस्थान फ्रंटियर मुख्यालय रो दौरा कीनो। ई दौरान वे आला अहलकारां सागे मुलाकात कर र राजस्थान फ्रंटियर माथे लड़ाई रा हालात मांय हिफाजत ऊं जुड़ी व्यवस्थावां रा बारा मांय चर्चा कीनी अर जरूरी हुकम दीना। 8 दिसंबर, 2024 ने बी.एस. एफ. रो 60 वॉ स्थापना दिवस ई मणायो जावेला। वे ई री तैयारियां रो ई जायजो लीनो।

000

प्रदेश रा तापमान मांय उतार-चढ़ाव बीचे केई ठौड़ां पारो सामान्य ऊं नीचे चाल रह्यो है। अजमेर, सीकर, कोटा अर जोधपुर समेत केई ठौड़ां रात री बगत तापमान सामान्य ऊं नीचे दर्ज करी ज्यो। सिरोही जिला

रा माउंट आबू मांय सब ऊं कम 6 दशमलव 4 डिग्री सेल्सियस तापमान दर्ज करी ज्यो। तेज ठण्ड ऊं वठे लोग सर्दी ऊं बचाव सारू गर्म कपड़ा अर अलाव काम लेवण लाग्या है। राज्य रा मैदानी हलकां मांय आज ई सीकर ज़िला रो फतेहपुर सब ऊं ठण्डो रह्यो जठे न्यूनतम तापमान 8 दशमलव 2 डिग्री सेल्सियस रिकॉर्ड करी ज्यो। राजधानी जयपुर मांय ई न्यूनतम तापमान काल रे मुकाबले डोढ़ डिग्री सेल्सियस उतर र साढ़े 13 डिग्री सेल्सियस नापी ज्यो।

000

भरतपुर मांय राख्यी ज्यी राज्य स्तर री सीनियर कुश्ती होड़ रा फाइनल मुकाबला आज व्ह्या। महिला कुश्ती मांय उदयपुर री सोनिया, जयपुर री सुमन, भरतपुर री अन्नू अर रोहिणी जीत हासिल कीनी जद के पुरुष वर्ग मांय भरतपुर रा परमिंदर विष्णु, सीकर रा नेतराम, राजसमंद रा मंथनराज अर झुन्झुनू रा सचिन कुमार आप-आप रा वर्गा मांय खिताब जीत्या। ग्रीको रोमन अर फ्री स्टाइल कुश्ती री ई होड़ मांय करीब 500 पहलवान सिरकत कीनी।

000